

Dumonda Roffler concernent la realisaziun da l'artitgel 7a da la Lescha da chatscha e sia concretisaziun en l'ordinaziun

Tenor il stadi actual n'è l'art. 7a al. 2 da la Lescha federala da chatscha (LChP) betg vegnì realisà cumplettaivain sin il stgalim da l'ordinaziun (Ordinaziun da chatscha, OChP) (lit. a) respectivamain betg pled per pled (lit. c). Ina discrepanza tranter la lescha e l'ordinaziun datti particularmain en dus puncts centrals:

1. Regulaziun dals lufs per proteger ils spazis da viver e la diversità da las spezias

L'art. 7a al. 2 lit. a LChP permetta da regular ils lufs, sch'ils spazis da viver u la diversità da las spezias èn periclitads. Spazis da viver protegids sco palids planivas u pastgiras e prads sitgs gaudan tenor la Constituziun sco er tenor la Lescha per promover la protecziun da la natira e da la patria ina protecziun cumplexsiva. La gronda part da questas surfatschas èn obligatoricamain dependentas d'ina cultivaziun, per exempel cun laschar pascular u cun segar. Sche questa cultivaziun daventa nunpussai vla u zunt difficila pervia da la preschientscha da lufs, pudessan questas surfatschas perder lur valur per la protecziun da la natira. Decisivas èn en emprima lingia las glistas cotschnas da las spezias d'animals e da plantas periclitadas sco er las glistas da las spezias sut responsabladad e da las spezias da prioritad. Per il luf inditgescha questa glista ina responsabladad ed ina prioritad minimala. Plinavant n'è il territori da derasaziun potenzial dal luf en Svizra betg limità al territori da muntogna. Pliras tschient spezias sut responsabladad vegnan avant en Svizra exclusivamain en il territori da muntogna ed èn obligatoricamain dependentas da pastgiras cultivadas e da prads cultivads. Tenor la Convenziun da Berna vala il luf dapi curt temp sco «protegi». Uschia ha el il medem status da protecziun sco il misarogn, il tschierv, il chavriel, la muntanella, il tais e la fiergna dal puppen alv. L'aggiunta II da la Convenziun da Berna cuntegna las «spezias strictamain protegidas». La glista cumpiglia pliras tschient spezias. Insaquantas da questas spezias vegnan avant er en il terren agricul dal Grischun. La dumonda sa tschenta, co ch'il chantun garantescha la protecziun da las spezias respectivas, sche la preschientscha dal luf chaschuna donns directs ed indirects.

2. Regulaziun dals lufs en cas d'ina decimaziun excessiva da populaziuns da selvaschina

L'art. 7a al. 2 lit. c LChP permetta da regular ils lufs, per «mantegnair populaziuns da selvaschina adequatas sin plaun regiunal». En l'ordinaziun (art. 4b al. 2 lit. b OChP) è questa idea dentant vegnida adattada tematicamain: regulaziuns èn permessas per «impedir ina reducziun excessiva da la populaziun regiunala da mamals selvadis cun unglas pèr». Numnadas n'èn pia betg pli las populaziuns da selvaschina en general, mabain mo anc ils mamals cun unglas pèr. Questa negligentscha da l'intenziun da la lescha è fitg problematica. Ella cuntegna la ristga, che animals selvadis periclitads e protegids, sco p.ex. las spezias da chatscha bassa cot da draussa e cot selvadi pitschen sco er lieu alva e lieu brina, vegnian en miseria. Questas spezias pon vegnir periclitadas supplementarmain tras predaziun directa, tras perdita dal spazi da viver perquai ch'ins ha dà si pastgiras d'alp e da guaud sco er tras mesiras per la protecziun da muntaneras (chauns da protecziun da muntaneras, saivs, disturbis durant la notg tras glisch e canera). Per questas spezias vegnan prendidas mesiras da promoziun sistematicas sin nivel naziunal e spezialmain en il chantun Grischun. I na fa betg senn, sche promoziuns charas vegnan impeditas pervia da la protecziun dal luf.

En quest senn supplitgain nus la Regenza da responder las suandantas dumondas:

1. Co quinta la Regenza da schliar en la pratica accuratamain la discrepanza tranter las disposiziuns da la lescha (art. 7a LChP) e da l'ordinaziun respectiva (art. 4b OChP)?
2. È la Regenza pronta, d'introducir activamain la regulaziun dals lufs, sche spazis da viver protegids e spezias protegidas èn periclitads, quai per ademplir las disposiziuns respectivas da la protecziun da la natira?
3. È er la Regenza da l'avis, che la LChP permetta ina regulaziun er, sche las populaziuns da chatscha bassa vegnan – pervia da la preschientscha dal luf – decimadas sin plaun regiunal ad ina dimensiun insufficienta per la protecziun da la natira respectivamain èn gia sin in nivel memia bass? Sche gea: Co vegn questa disposiziun (art. 7a al. 2 lit. c LChP) a vegnir realisada concretamain en l'execuziun?

Cuira, ils 22 d'october 2025

Roffler, Zanetti (Sent), Schutz, Bärtsch, Beeli, Berther, Brandenburger-Caderas, Brunold, Caduff, Candrian (Flem Vitg), Casutt, Cortesi, Crameri, Crüzer, Della Cà, Dürler, Furger, Gort, Grass, Hassler, Heim, Holzinger-Loretz, Jochum, Koch, Kocher, Krättli, Laim, Lamprecht, Lehner, Loi, Luzio, Menghini-Inauen, Messmer-Blumer, Metzger, Morf, Padrun, Righetti, Schneider, Sgier, Spagnolatti, Stocker, Tomaschett, Ulber Daniel, von Tscharnier